



SULEQATIGIISITSISUT
SAMARBEJDSPARTIET

29. oktober 2018

EM2018/80

Naqqiut

Naqqiutip siusinnerusukkut nassiussaq taarserpaa. Danskisuuani allaqqavoq EM 20198, kalaallisuuani allaqqasoq UPA 2018. Dansikuusa eqqortumik allaqqavoq. EM 2019

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Nuna tamakkerlugu Pinaveersaartitsinermit Siunnersuisoqatigiinnik pilersitsinissaq pillugu kingusinnerpaamik UKA2019 - mi siunnersuummik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Siunnersuisoqatigiit Naalackersuisunut, Inatsisartunut taamatullu kommuninut siunnersuisartuussapput atulissallutillu najukkani pinaveersaartitsinermit ataatsimiititaliaq, Imigassaq aamma Ikiaroorartoq pillugit Siunnersuisoqatigit kiisalu immaqqa Peqqinnissaqarfinni pinaveersaartitsisutut siunnersortitut atorfillit taarserlugit.

(Inatsisartunut ilaasortaq Tillie Martinussen, Suleqatigiissitsisut)

Tungavilersuut:

Meeqqat pillugit inatsit nutaaq naapertorlugu kommunit pinaveersaartitsinikkut suliaqarnerunissaat inassutigineqarpoq KANUKOKA' p atorunnarsinneqarnerata kingorna kinguneraa inunnik isumaginninnermi peqqissutsikkullu sulinermi artorsarnerulerneq pisortanit sulisut killeqarnerat pissutigalugu, taamaattumik Suleqatigiissitsisuni isumaqarpugut pinaveersaartitsineq pillugu nutaanik eqqarsartariaqalersugut. Kikkut tamarmik soqutigisariaqarpaat pinaveersaartitsinerup iluani sulinermi piffissamik sipaartoqartarnissaa isumassarsisoqarneraniik piviusunngortitsinissap tungaanut, ullumikkulli periutsit naapertorlugit piffissarujussuaq atorneqartarpoq immikkoortuni sulianik ataqatigiissaarinermit uffa taakku suliaat assigiikkaluartut - tassa pinaveersaartitsinermit nukittorsaaneq suliaralugu. Taamaattumik siunnersuutigaara, najukkani pinaveersaartitsinermit ataatsimititaliaq 1, Imigassamut Ikiaroorartumullu

EM 2018/79

J.nr. 01.25.01/18EM-LABU-00079

Side 1 af 4

Siunnersuisoqatigiit 2 kiisalu peqqinnissaqarfimmi 3 pinaveersaartitsisunik atorfeqartoqarpat taakku tamaasa eqitissagigut 4 , pilersillugillu nuna tamakkerlugu Pinaveersaartitsinermut siunnersuisoqatigiit.

Tassa oqartussaaffiit katitissagigut ullumuikkut Naalakkersuisut ataaniittut tamarmillu najukkami imaluunniit nuna tamakkerlugu pinaveersaartitsineq eqqarsaatigalugu immikkut tamarmik iliuusissanut pilersaarusiortullu periusissarsiortartut.

Nuna tamakkerlugu pinaveersaartitsinermut siunnersuisoqatigiit minnerpaamik suliarissavai immikkoortortat eqitikkat ulluinnarni suliarisartagaat. Siunnersuisoqatigiit Naalakkersuisunuinnaanngitsaq siunnersuisassapput aammali kommunit Inatsisartunullu - soorlu meeqqat illersuisuat ullumikkut taamaaliortartoq. Suleqataasassapput kommunit Namminersorlutik Oqartussallu assigiimmik pitsaasumillu pinaveersaartitsineq pillugu politikissaannut, soorlu akuerineqartutut meeqqanik ikorfartuinissaq pillugu inatsimmi aamma taamaasilluni pinaveersaartitsineq eqqarsaatigalugu ilisimasaqarnerulersitsissassaaq taamatullu pitsaasumik toqqammaviliisarluni.

Nunarput isorartoorsuuvoq taamaakkaluortoq neqeroortutiginnaasariaqarparput innuttaasut pillugit pinaveersaartitsinikkut assigiimmik sulineq. Siunnersuisoqatigiit aamma Inatsisartut sulinerannut ikorfartuisinnaavoq pinaveersaartitsinerup iluani ajornartorsiutinut ilisimasaqarluartutut taamaasillutillu qularnaarlugu aalajangiinissatta ataqatigiittuarnissaat -tamannami innuttaasunut pinaveersaartitsinermut atorfissaqartitsinerpaasunut pisariaqarpoq. Peqataanik siunnersuisoqatigiit ilinniarluarsimasut pigisagut katersortarsinnaavaat atorluarlugillu – ilisimasanik avitseqatigiinnermut iluaqutaasussamik taamaasillunilu aamma sulisut pikkorissut pigiinnarnissaanut ataqatigiissitseqqittussamik allaffissornikkullu sipaarfiussamik.

Takorloorpara siunnersuisoqatigiit ukiumoortumik saqqummersitsissasasut, siunnersuisoqatigiinnullu qitiusassasooq ataqatigiissitsinissaq, pinaveersaartitsineq pillugu Inatsisartunut, kommunit Naalakkersuisunullu siunnersuisarnissaq, attuumassutillit annerpaamik sunniuteqarnissaannut aqqutissiuisuunissaq kiisalu siunnersuisoqatigiit soorlu aamma ataatsimiinnernut atatillugu allaffissornikkut aningaasartuutiminnik minnerpaaffimmiititsissassapput qarasaasiakkut attaveqaatinik pioreersunik atuinnermikkut. Siunnersuisoqatigiit inuttalersornissaannut tunngatillugu ilaasortaasinnaapput Naalakkersuisoqarfinneersut ilinniarsimasut, peqqinnissaqarfimmeersut, politiineersut, kommunineersut il.il. Naalakkersuisut immikkoortumi nukiit pigisatta atorluarnerunissaat pillugu oqallinnermut isumaasa tusarnissaannut qilanaarpunga kiisalu partiit allat aamma saqqummiukkumaagassaannut.

Pisortanut aningaasatigut allaffissornikkullu kingunerisassai:

Aningaasarsiornikkut allaffissornikkullu pisortanut kingunissai.

Peqqinnissaqarfiup aqunneqarnera, aqqissuusaanera kiisalu peqqinnissamat tunngasutigut sullissisut aamma tarnip pissusaanik ilisimasallit pillugit Inatsisartut inatsisaannut nr. 27 - mut, 18. november 2010 - meersumut oqaaseqaatini naloginnaasuni najukkani pinaveersaartitsinermut ataatsimiititaliat pillugit ima oqartoqarpoq: "Peqqinnissaqarfik pinaveersaartitsinermut ataatsimiititalianut atatillugu ullumikkut aningaasartuuteqarneq ajorpoq. Taamaattumik ataatsimiititaliat eqqarsaatigalugit siunissami aningaasartuuteqartoqartarnissaa aamma naatsorsuutigineqanngilaq."

Taamaasilluni najukkani pinaveersaartitsinermut ataatsimiititaliat sulinerat nuna tamakkerlugu pinaveersaartitsinermut siunnersuisoqatigiinnit tiguneqarpat tamanna aningaasaliissutaareersunik atunngitsuukkanik nassataqassanngilaq.

Nuna tamakkerlugu pinaveersaartitsinermut siunnersuisoqatigiit suliasaqarnerulernissaat eqqarsaatigalugu, allaffissornikkut ikorfartuisoqarnissaa naatsorsuutigisariaqarpoq. Imigassaq

Ikiaroornartorlu pillugit Siunnersuisoqatigiit suliaat nuna tamakkerlugu pinaveersaartitsinermit siunnersuisoqatigiinnit tiguneqarpata allaffissornikkut kiffartuunneqarnissamut aningaasaliissutaareersut ilaat pineqarsinnaalissapput. Aningaasat taakku nuna tamakkerlugu pinaveersaartitsinermit siunnersuisoqatigiinnut nuunneqarsinnaapput. Imigassaq ikiaroornartorlu pillugit siunnersuisoqatigiit annikitsumik pisariaqartitsisinnaanerit ilimanarsinnaavoq, pisariaqartitsinerulli tamakkiisup ilinniagartuup ukiup ataatsip ukiullu aappaa avillugu akornanni sulinissaanit sivilinerussagatinneqanngilaq, tassa 500.000 koruunit missaani naleqarsinnaassaaq.

Pinaveersaartitsinermit ataatsimiititaliat suliaat nuna tamakkerlugu pinaveersaartitsinermit siunnersuisoqatigiinnut suliaannut ilanngunneqassapata inatsit pioreersoq annikitsumik allanngortinneqartariaqassaaq. Aamma taamaappoq Imigassamut Ikiaroornartumullu Siunnersuisoqatigiit eqqarsaatigalugit. Tamatuma saniatigut nuna tamakkerlugu pinaveersaartitsinermit siunnersuisoqatigiinnik pilersitsinissamut aalajangersakkanik nutaanik sanasoqartariaqassaaq allaaserineqarlutillu sinaakkutissat tigussaasut. Inatsisilerinermit tamatumunnga ilinniagartuup ataatsip ukioq ataaseq imaluunniit ukiup aappaa avillugu atortariaqassavai, tassa naleqassaaq 500.000 koruunit aamma 750.000 koruunit akoranni.

Namminersortunut aningaasaatigut allaffissornikkullu kingunerisassai:

Soqanngilaq

Innuttaasunut aningaasaatigut allaffissornikkullu kingunerisassai:

Soqanngilaq

1

Naalakkersuisut namminneq nalilertariaqassavaat pinaveersaartitsinermit siunnersortit sulinerisa ilisimasaasa, allaffissornertaata aningaasartaasalu ilanngunneqarnissaat iluaqutissartaqarnersoq imaluunniit pinaveersaartitsinermit siunnersortit sulinerat arlaatigut allatigut nukittorsarneqarsinnaanersoq pinaveersaartitsinermit siunnersuisoqatigiit suliaannut qanittumik.

2

Pilersinneqassaaq imigassaq aalakoornartortalik pillugu Inatsisartut Inatsisaanni nr. 35 -mi 23. November 2017 -meersumi § 38 naapertorlugu.

3

Naalakkersuisut namminneq nalilertariaqassavaat pinaveersaartitsinermit siunnersortit sulinerisa ilisimasaasa, allaffissornertaata aningaasartaasalu ilanngunneqarnissaat i luaqutissartaqarnersoq i maluunniit pinaveersaartitsinermit siunnersortit sulinerat arlaatigut allatigut nukittorsarneqarsinnaanersoq pinaveersaartitsinermit siunnersuisoqatigiit suliaannut qanittumik.

4 Peqqinnissaqarfiup aqunneqarnera, aqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27 -mi, 18. november 2010-meersumi § 5 naapertorlugu pilersinneqassaaq.